

Na osnovu člana 15. Zakona o principima lokalne samouprave u Federaciji BiH („Službene novine Federacije BiH”, broj: 49/06 i 51/09) i člana 45. Statuta Općine Kakanj („Službene novine Općine Kakanj”, broj: 4/08), Općinski načelnik na ____ sjednici Općinskog vijeća održanoj ____ . ____ .2019. godine, p o d n o s i:

IZVJEŠTAJ

o ostvarivanju politike jedinice lokalne samouprave i aktivnostima Općinskog načelnika za 2018. godinu

U V O D

Općinski načelnik je nadležan za provođenje općinske politike i izvršavanje općinskih propisa, kao i obavljanje svih dužnosti koje na općinu prenesu kantonalne i federalne vlasti. Zakon o principima lokalne samouprave u Federaciji BiH jasno definiše da općina ima pravo, osim vlastite nadležnosti ustanovljene Ustavom, baviti se i svim pitanjima od lokalnog značaja koja nisu isključena iz njene nadležnosti, niti dodijeljena u nadležnost nekoj drugoj vlasti na osnovu Ustava i zakona. U cilju poštivanja ustavnosti, zakonitosti i javnosti u provođenju općinske politike, načelnik Općine Kakanj dužan je izvještavati Općinsko vijeće o provedenim aktivnostima i obavljenim poslovima iz djelokruga lokalne samouprave i prenesenih poslova sa viših nivoa vlasti.

Radom Jedinštenog općinskog organa uprave rukovodi Općinski načelnik, kao organ izvršne vlasti u Općini, a u skladu sa Ustavom, zakonima, Statutom i drugim važećim propisima. Rukovođenje Jedinštenim organom uprave, Općinski načelnik ostvaruje putem svojih pomoćnika, koji neposredno rukovode službama za upravu.

U izvještajnom periodu aktivnosti Općinskog načelnika i Jedinštenog općinskog organa uprave Općine Kakanj bile su usmjerene, kako na redovne (Programom rada utvrđene zadatke), tako i na vanredne poslove koji su se pojavljivali u toku rada. Aktivnosti Općinskog načelnika su u svakom trenutku bile usmjerene na poboljšanje položaja Općine kao jedinice lokalne samouprave, te podizanje kvaliteta života građana općine na viši nivo.

AKTIVNOSTI OPĆINE KAKANJ I OPĆINSKOG NAČELNIKA U 2018. GODINI

U toku izvještajnog perioda Općinski načelnik je usmjeravao djelovanje Jedinštenog općinskog organa uprave Općine Kakanj u obavljanju poslova iz samoupravnog djelokruga Općine i nadzirao njegov rad. Aktivnosti Općinskog načelnika i Jedinštenog općinskog organa uprave Općine Kakanj u 2018. godini bile su usmjerene u slijedećim pravcima:

I LOKALNI EKONOMSKI RAZVOJ, PODUZETNIŠTVO I POLJOPRIVREDA

U 2018. godini, kao i prethodnih godina nastavljene su aktivnosti oko stvaranja što povoljnijeg poslovnog ambijenta, radi ulaganja domaćeg i stranog kapitala na području općine Kakanj, kao i otvaranja novih radnih mjesta. U cilju poboljšanja ekonomskog razvoja općine Kakanj kontinuirano radimo na iznalaženju potencijalnih investitora koji su spremni ulagati na području naše općine, organiziramo sastanke sa privrednicima i poljoprivrednim proizvođačima radi otklanjanja prepreka za razvoj privrede i nova zapošljavanja, promoviramo privredne resurse općine Kakanj, promoviramo razvoj poduzetništva i obrta, aktivno saradujemo sa privatnim sektorom i iznalazimo nove mogućnosti za poboljšanje ambijenta za razvoj poduzetništva, kreiranjem budžeta i programa utroška sredstava težimo da se dio socijalnih izdvajanja pretvori u poduzetničku podršku, dajemo značaj vlastitom učešću poljoprivrednih proizvođača i poduzetnika u svakom pojedinačnom projektu, pružamo maksimalnu podršku lokalnom biznisu s ciljem da u najkraćem roku i na jednom mjestu poduzetnik riješi svoje zahtjeve, koji se tretiraju kao zahtjevi visokog prioriteta u radu općinskih službi, pružamo podršku postojećim poslovnim djelatnostima i motiviramo potencijalne poduzetnike na što ranije započinjanje novih poslova, u budžetu i programima planiramo podsticaje za razvoj poduzetništva, obrta i poljoprivrede radi motivisanja građana za otpočinjanje vlastitog biznisa, kroz pozitivne primjere radimo na povećanju poduzetnosti stanovništva, sufinansiramo nabavke novih i tehnološki naprednih proizvodnih mašina i opreme za mala preduzeća i obrtnike s ciljem podizanja njihove konkurentnosti, osnažujemo programe obuke, prekvalifikacije i stručnog usavršavanja za nezaposlene osobe, sa posebnim fokusom na preduzeća koja donose nove i napredne tehnologije, radi ponude zainteresovanim investitorima

identificirali smo slobodne lokacije za gradnju u blizini glavnih putnih komunikacija u državnom i privatnom vlasništvu, poduzimamo aktivnosti oko izmjene prostorno-planske dokumentacije, kako bi stvorili što povoljnije uslove za razvoj privrede, zapošljavamo i financiramo rad lica sa VSS stručnom spremom u privatnom sektoru, promoviramo društvenu odgovornost preduzeća, te zajedničke inicijative i projekte, radimo na realizaciji programa razvoja turizma i korištenja turističkih potencijala, radimo na jačanju veza sa stanovništvom u dijaspori i dr.

U 2018. godini realizirane su brojne aktivnosti koje su usmjerene na razvoj poduzetništva, nova zapošljavanja, podizanje poduzetničke svijesti i stvaranje povoljnijeg ambijenta, te brojne podsticajne mjere za pokretanje i razvoj malog i srednjeg poduzetništva.

Kroz projekat „**Pokreni svoj posao u Kaknju**“, podsticaj je ostvarilo **32** nezaposlene osobe koje su, uz pomoć Općine, pokrenule i registrirale vlastitu djelatnost. Korisnicima podsticajnih sredstava sufinansirana je nabavka sredstava za rad, repromaterijala, opreme i sl., za registrovanu djelatnost u maksimalnom iznosu do 3.000,00 KM i refundiraju se troškovi obaveznih doprinosa – PIO, zdravstveno osiguranje i osiguranje od nezaposlenosti, za registrovanu djelatnost – period od 24 mjeseca (prva godina u iznosu od 100%, a maksimalno 350,00 KM/mjesec, druga godina 50%, a maksimalno 175,00 KM/mjesec). Projekat „Pokreni svoj posao u Kaknju“ sufinansiran je i od strane Vlade ZDK za što su nam u 2018. godini isplaćena sredstva u iznosu od 25.000,00 KM. Shodno obavezama prema korisnicima (refundacija troškova obaveznih doprinosa) realizacija Projekta će se nastaviti i u 2019. godini. Za realizaciju projekta „Pokreni svoj posao u Kaknju“ utrošena su sredstva u iznosu **114.251,53** KM. Ukupna brojka korisnika podsticajnog projekta „Pokreni svoj posao u Kaknju“ za period 2013-2017. godina iznosi **79**, a ukupna suma isplaćenih podsticajnih sredstava po ovom osnovu iznosi **450.059,11** KM.

Podsticajna sredstva za **refundaciju troškova osnivanja obrtničkih** (osnovno zanimanje), trgovačkih i ugostiteljskih radnji i dijela troškova osnivanja preduzeća – d.o.o. u 2018. godini ostvario je **82** korisnika (14 pravnih lica – d.o.o, 3 ugostiteljska, 20 trgovačkih i 45 obrtničkih radnji). Ukupno realizovana sredstva iznose **33.076,93** KM. U periodu 2013-2017. godina ova podsticajna sredstva su koristila ukupno **235** korisnika, a ukupan iznos podsticajnih sredstava za ovaj period iznosi **129.785,90** KM.

Pravo prijave na Javni poziv za **sufinansiranje dijela troškova zakupa poslovnog prostora**, imala su fizička i pravna lica koja su registrovala djelatnost kao obrt ili preduzeće – d.o.o. na području općine Kakanj u 2017. i 2018. godini, a koja su svoje poslovne aktivnosti obavljala u prostorijama na osnovu Ugovora o zakupu. Ovu vrstu podsticaja ostvarilo je **5** pravnih/fizičkih lica u iznosu od **3.835,00** KM.

U 2018. godini Općina je novčanim iznosom od **109.847,60** KM sufinansirala troškove **obuke, dokvalifikacije i prekvalifikacije za poslove zavarivača, krojača, bravara i drugih zanimanja** shodno potrebama tržišta rada. Ovom vrstom podsticaja nastojalo se omogućiti nezaposlenim osobama sa završenom srednjom školom, koje se nalaze na evidenciji Biroa za zapošljavanje, starosne dobi do 35 godina, priprema za rad kroz obuku, dokvalifikaciju i prekvalifikaciju kod zainteresovanih poslovnih subjekata sa područja općine Kakanj, u namjenski opremljenim prostorijama, a radi jačanja konkurentnosti na tržištu rada, povećanja kompetencija i šansi za zapošljavanje. Obuku, dokvalifikaciju i prekvalifikaciju kandidata su obavljali certificirani majstori zaposleni kod poslovnih subjekata koji su iskazali interes za učešće u ovom Projektu. Općina je poslovnim subjektima sufinansirala troškove obuke, dokvalifikacije i prekvalifikacije nezaposlenih osoba u maksimalnom iznosu do 1.500,00 KM po kandidatu. Zaprmljeno je 5 prijava poslovnih subjekata koji su potraživali ukupno 74 nezaposlene osobe, te je shodno tome uspješno završena obuka nezaposlenih osoba za slijedeća zanimanja: 45 zavarivača, 11 krojača, 9 frizera, 7 bravara i 2 automehaničara. Polaznici obuke su prošli kroz teoretsku (20 radnih sati) i praktičnu nastavu (120 radnih sati) i na kraju su im dodijeljeni certifikati/potvrde o uspješno završenoj obuci. Od 74 nezaposlene osobe koje su uspješno završile obuku do sada je **42** zaposleno.

Planirana su i podsticajna sredstva za **regresiranje kamata** po kreditima odobrenim u komercijalnim bankama u 2018. godini za poduzetnike i obrtnike sa područja općine Kakanj (osim za trgovine i ugostiteljstvo), te za regresiranje kamata po kreditima odobrenim u 2016. godini poduzetnicima i obrtnicima koji su ostvarili pravo na ovaj podsticaj u 2016. godini (Programom je definisano da će Općina korisnicima podsticaja refundirati kamate za cijeli otplatni period, pojedinačno za svaku godinu na kraju kalendarske godine). Pravo na dodjelu podsticajnih sredstava namijenjenih za ovu vrstu podsticaja u 2018. godini ostvarilo je **5** pravnih/fizičkih lica i isplaćena su podsticajna sredstva poduzetnicima koji su na to ostvarili pravo u 2016. godini. Ukupno su utrošena sredstva u iznosu **5.774,95** KM.

Na Javni poziv za odobravanje i dodjelu podsticajnih sredstava za finansiranje projekata iz oblasti poduzetništva „**Podrška lokalnom ekonomskom razvoju**“ prijavilo se udruženje „Razvojni centar Općine Kakanj“. Realizacija aktivnosti predviđenih ovim Projektom imala je za cilj: bolju promociju i informiranost potencijalnih i sadašnjih poduzetnika o uslovima privređivanja i podsticajnim mjerama sa svih nivoa vlasti, edukativne aktivnosti iz oblasti poduzetništva, aktivnosti poslovnog umrežavanja u oblasti poduzetništva, podršku u izradi strateških dokumenata, te izradu baze podataka od značaja za lokalni ekonomski razvoj.

Shodno potpisanom ugovoru „Razvojnog centru Općine Kakanj“ za realizaciju pomenutog projekta odobrena su sredstva u iznosu **21.934,00 KM**.

Općina Kakanj je u saradnji sa humanitarnom organizacijom Muslim Aid iz Sarajeva realizovala projekat „**Ekonomsko osnaživanje socijalno i materijalno ugroženih osoba i mladih osoba kroz proizvodnju povrća u plastenicima na području općine Kakanj**“. Vrijednost Projekta je **48.700,00 KM**, od čega je finansijsko učešće Općine 19.480,00 KM. Program je organizovan na principima saradnje i sufinansiranja projekta, a istim je obuhvaćeno **20** korisnika kojima su obezbijeđeni plastenici površine 100 m², sistem za navodnjavanje kap po kap, sadni materijal za jesenju sjetvu i sadnju, malč folija, te edukacije iz plasteničke proizvodnje. Omjer sufinansiranja izražen u procentima je bio: 40% LDS Charities (19.480 KM), 40% Općina Kakanj (19.480 KM) i 20% krajnji korisnici (9.740,00 KM). Općina Kakanj i Muslim Aid su već realizovali isti projekat u oblasti plasteničke proizvodnje u 2015. godini.

Podsticajna sredstva planirana za projekat „**Sufinansiranje samozapošljavanja i zapošljavanja osoba sa invaliditetom**“ bila su namijenjena ili za „finansiranje zakupa poslovnog prostora firmama koje na području općine Kakanj formiraju organizacione jedinice u kojima će se upošljavati osobe sa invaliditetom (12 mjeseci) ili za „samozapošljavanje osoba sa invaliditetom koje pokrenu ili su u 2017. godini pokrenule vlastiti biznis i registrovale djelatnost“. Shodno tome finansiran je zakup poslovnog prostora društvu koje je u Kakanju formiralo organizacionu jedinicu i zaposlilo **7** osoba za invaliditetom (11 mjeseci po 320,00 KM). Također su istom društvu isplaćena i podsticajna sredstva u iznosu 3.000,00 KM za nabavku opreme i repromaterijala. Podsticajna sredstva namijenjena za samozapošljavanje odobrena su jednom fizičkom licu koje je registrovalo djelatnost i pokrenulo vlastiti biznis. Korisniku podsticajnih sredstava sufinansirana je nabavka opreme, mašina i repromaterijala i refundiraju se troškovi obaveznih doprinosa (period 24 mjeseca). Shodno obavezama prema korisnicima podsticajnih sredstava realizacija Projekta će se nastaviti i u 2019. godini. Za „Sufinansiranje samozapošljavanja i zapošljavanja osoba sa invaliditetom“ utrošena su sredstva u iznosu **10.341,39 KM**.

Projekat ekonomskog osnaživanja žena je realizovan u saradnji sa Udruženjem žena općine Kakanj „UŽOK“ kroz obuku šivanja, tkanja, pletenja i dekupaž. Ukupno je **40** žena pohađalo i uspješno završilo obuku, te osposobljeno za samostalan rad. Omogućeno im je da osim za svoje potrebe pruže uslugu i drugima, te na ovaj način zarađuju novac za sebe i svoju porodicu. Za ovaj projekat utrošena su sredstva u iznosu **15.000,00 KM**.

Projekat „**Razvijanje poduzetničke svijesti kod učenika završnih razreda srednjih škola sa područja općine Kakanj**“ realizovan je u saradnji sa srednjim školama sa područja općine Kakanj i cetrificiranim edukatorima za predmetnu oblast. Cilj ovog projekta bio je razviti poduzetničku svijest kod srednjoškolaca sa područja općine Kakanj, te im omogućiti da steknu određena znanja, vještine i sposobnosti potrebne za razvijanje poduzetničkih ideja. Tokom edukacije, učenici su upoznati i sa postupkom registracije djelatnosti, mogućnošću korištenja podsticajnih programa podrške za registrovanu djelatnost, odnosno kako postati i biti poduzetnik. Obuku (3 dana) je uspješno završilo **12** učenika. Po završetku obuke zainteresovani učenici su imali zadatak za izrade biznis plan i oni koji su isti izradili i dostavili nadležnoj Službi, novčano su nagrađeni. Ukupno su utrošena sredstva u iznosu **4.452,36 KM**.

Općina kontinuirano radi na promociji kakanjskih proizvoda i usluga. Podsticajna sredstva namijenjena za **promociju razvoja poduzetništva i obrta** u iznosu od **10.315,79 KM** utrošena su za kotizaciju i troškove prijevoza za učešće 11 izlagača sa područja općine Kakanj na Sajmu organske i poljoprivredne proizvodnje i etno-narodnog stvaralaštva OPEN'S – ZENICA 2018, učešće 3 izlagača sa područja općine Kakanj na sajmu Jesen u Visokom, kotizaciju i troškove prijevoza 7 izlagača na Sajmu privrede, poljoprivrede, zanatstva i roba široke potrošnje 2018 KJP-Centar „Skenderija“ d.o.o Sarajevo, te učešće Udruženja žena Općine Kakanj na izložbi Kulturnog nasljeđa pod nazivom „Žena u ogledalu bh. tradicije“. Također je korisnicima općinskog podsticajnog projekta „Pokreni svoj posao u Kakanju“ plaćena pretplata za korištenje Bizbook-a (poslovna platforma) radi umrežavanja sa drugim kompanijama i poboljšanja svog poslovanja, te štampanje revidirane „Strategije razvoja Općine Kakanj 2007-2020“ sa novim akcionim planom za period 2018-2020 godine. Općina Kakanj je u saradnji sa NTV „IC“ Kakanj organizovala snimanje 6 polusatnih emisija u svrhu promocije poduzetništva i podizanja poduzetničke svijesti kod mladih sa područja općine Kakanj kroz projekat „Pokreni svoj posao u Kakanju“, objavljujani su razni sadržaji vezani za poduzetništvo i obrt, medijski predstavljani korisnici podsticaja i dr. Predmetnim sredstvima plaćena je registracija domena i web hosting paketa za razvoj web-stranice i newslettera-a „Invest in Kakanj“. Općina Kakanj je u saradnji sa NTV „IC“ Kakanj organizovala i snimanja video spotova turističkih potencijala i kulturno-historijskih znamenitosti na području općine Kakanj.

U 2018. godini nastavljene su aktivnosti na uređenju i izgradnji poslovnih objekata na PZ „Vrtlište“ Kakanj, kao i aktivnosti vezane za novu zonu „Modrinje“. Također su realizirane ili je u toku realizacija sljedećih aktivnosti: realizacija Regionalnog programa lokalne demokratije na Zapadnom Balkanu (ReLOaD), izrada Elaborata o karti upotrebne vrijednosti zemljišta za područje općine Kakanj, BFC SEE –

Certifikacija gradova i općina sa povoljnim poslovnim okruženjem u jugoistočnoj Evropi, realizacija Projekta RAST – razvoj lokalnog ekonomskog razvoja, IFAD VII – Program razvoja ruralne konkurentnosti (RCDP) razvoj klastera i odabranih lanaca vrijednosti i unapređenja konkurentnosti klastera u oblasti poljoprivrede (Klaster IV- proizvodnja povrća) i dr.

Kako bi mlade nezaposlene osobe sa VSS stručnom spremom stekle prvo radno iskustvo, provedena je procedura prijema **29** lica na stručno osposobljavanje ili pripravnika (VSS) u privatnom sektoru, a koje se finansira iz Budžeta Općine Kakanj (**163.000,00** KM). Ukupno ulaganje za ove programe u periodu 2013-2017. godina iznosi **757.033,22** KM.

Ukupna brojka registrovanih pravnih i fizičkih lica u oblasti privrede na području općine Kakanj u 2018. godini iznosi **1.091** (fizička lica-553, autoprevoznici-37, obrtnici-266, profesionalne djelatnosti-33, taksisti-41, trgovine-110, ugostitelji-66, pravna lica i poslovne jedinice-533).

U svrhu podsticaja razvoju poduzetništva i obrta, Općina Kakanj je u 2018. godini realizirala iznos od 428.361,89 KM (iz Budžeta Općine Kakanj 375.651,94 KM, a 52.709,95 KM sredstava drugih nivoa vlasti i nevladinih organizacija). Za period 2013-2017. godina, kroz podsticajne programe u poduzetništvu uloženo je 1.104.829,01 KM.

U oblasti poljoprivrede, tokom 2018. godine, primljeno je 4.920 stranaka. U Registar poljoprivrednih gazdinstava i registar klijenata je do kraja 2018. godine upisano 1.730 poljoprivrednih gazdinstava (u 2018. godini novoupisanih u RPG i RK 119, a 976 stranaka je ažuriralo podatke), a također se povećava i broj poljoprivrednih proizvođača koji registruju poljoprivredu kao osnovnu djelatnost (21 samostalni poljoprivrednik u 2018. godini). Poređenja radi u 2018. godini je odobreno 1.166 zahtjeva za ostvarivanje prava na općinske podsticaje, dok je u 2015. godini odobreno 598 zahtjeva. Općinski podsticaji su značajno uticali i na povećanje nabavljene poljoprivredne mehanizacije, platenika, sistema za navodnjavanje „kap po kap“, zatim na povećanje obradivih površina, te proizvedenih, predatih i otkupljenih količina tržišnih viškova poljoprivrednih proizvoda i dr. Također je bitno napomenuti da općinska Komisija za podsticaje redovno obavlja monitoring realiziranih podsticaja.

Komisija za pripremu, organizaciju i realizaciju podsticaja u oblasti poljoprivrede za 2018. godinu je u toku protekle godine odobrila podsticaje za **1.166** podnešenih zahtjeva. Preduslov za ostvarivanje podsticaja je bio upis u RPG i RK, te ažuriranje podataka upisa u RPG i RK za 2018. godinu.

U 2018. godini realizirani su slijedeći podsticaji u oblasti poljoprivrede:

- Pčelarstvo – za ovaj podsticaj je primljeno, obrađeno i odobreno **111** zahtjeva i utrošeno **13.912,50** KM;
- Svinjogojstvo – za ovaj podsticaj je primljeno, obrađeno i odobreno **7** zahtjeva i utrošeno **2.900,00** KM;
- Specifične vrste poljoprivredne proizvodnje – za ovaj podsticaj je primljeno, obrađeno i odobreno **14** zahtjeva i utrošeno **4.000,00** KM;
- Plastenička i staklenička proizvodnja – za ovaj podsticaj je primljeno, obrađeno i odobreno **79** zahtjeva i utrošeno **20.170,00** KM;
- Sufinansiranje osnovne i dopunske obrade poljoprivrednog zemljišta u oblasti ratarstva – proljetna i jesenja obrada – za ovaj podsticaj je primljeno, obrađeno i odobreno **122** zahtjeva i utrošeno **29.798,34** KM;
- Podsticaj za otkupljivače svježeg kravljeg mlijeka sa područja općine Kakanj – za ovaj podsticaj je primljeno, obrađeno i odobreno **2** zahtjeva i utrošeno **7.000,00** KM;
- Podsticaj za organizovan otkup ljekovitog bilja, voća i povrća od individualnih poljoprivrednih proizvođača sa područja općine Kakanj – za ovaj podsticaj je primljeno, obrađeno i odobreno **5** zahtjeva i utrošeno **4.997,74** KM. Od strane otkupljivača koji su vršili otkup na području općine Kakanj ukupno je otkupljeno **300.706,75** kg voća i povrća;
- Podsticaj za sertifikaciju organske proizvodnje je isplaćen u iznosu od **750,00** KM za sufinansiranje sertifikacije organske proizvodnje za **3** korisnika;
- Nagrađivanje najuspješnijih poljoprivrednih proizvođača. Sredstva u iznosu od **4.000,00** KM su utrošena za manifestaciju “Nagrađivanje najuspješnijih poljoprivrednih proizvođača” u 2018. godini, koju je organizovao Savez poljoprivrednih udruženja “KAP” Kakanj, a pokrovitelj je bila Općina Kakanj;
- Podsticaj za registraciju poljoprivrede (osnovna djelatnost) je isplaćen u iznosu od **17.482,70** KM. Ovaj podsticaj je namijenjen za refundaciju troškova obaveznih doprinosa (PIO, zdravstveno osiguranje i osiguranje od nezaposlenosti) za registraciju srodne djelatnosti – poljoprivreda (osnovna djelatnost), a ukupno je registrovan **21** samostalni poljoprivrednik;
- Podsticaj za proizvođače svježeg kravljeg mlijeka (IV kvartal 2017, I, II i III kvartal 2018.) je isplaćen u iznosu od **70.457,87** KM (305 zahtjeva). Ukupna predata i otkupljena količina svježeg kravljeg mlijeka od strane otkupljivača u 2018. godini iznosi **833.646** litara;

- Podsticaj za predate količine jagodičastog voća je isplaćen u iznosu od **33.905,40 KM** (282 zahtjeva). Ukupna predata i otkupljena količina ploda jagodičastog voća od strane otkupljivaca u 2018. godini iznosi **291.864,83 kg**;
- Podsticaj za predate količine ploda zelenog feferona je isplaćen u iznosu od **7.294,92 KM** (14 zahtjeva). Ukupna predata količina ploda zelenog feferona sa područja općine Kakanj iznosi **89.512,60 kg**;
- Podsticaj za održavanje intenzivnih zasada visokostablašica (jabučasto, koštičavo i jezgrasto voće) i jagodičastog voća (američka borovnica i aronija) je isplaćen u iznosu **8.894,92 KM** (27 zahtjeva);
- Podsticaj za sufinansiranje nabavke nove poljoprivredne mehanizacije, priključaka, aparata i druge opreme u poljoprivredi je isplaćen u iznosu od **56.733,23 KM** (68 zahtjeva);
- Troškovi rada kancelarije Saveza poljoprivrednih udruženja „KAP“ Kakanj za 2018. godinu. Za podsticaj za troškove rada kancelarije Saveza poljoprivrednih udruženja „KAP“ Kakanj, a koji se odnosi na finansiranje zakupa prostora, režijskih i drugih troškova Saveza, bruto plaće i toplog obroka stručno administrativnog zaposlenika za 12 mjeseci i regresa, isplaćen je iznos od **27.878,64 KM**;
- Shodno potpisanim ugovorima o realizaciji općinskog podsticaja za refundaciju troškova obaveznih doprinosa (PIO, zdravstveno osiguranje i osiguranje od nezaposlenosti) za registraciju djelatnosti - poljoprivreda (osnovna djelatnost), obaveza Općine je bila da onima koji registruju poljoprivrednu djelatnost (osnovna djelatnost) u 2017. godini refundira troškove obaveznih doprinosa u prvoj godini sa 100%, u drugoj godini 50%, a preostalih 50% korisnik sredstava, dok u trećoj godini korisnik sredstava preuzima obavezu uplate doprinosa sa 100 %. Također za općinski podsticaj “Refundacija kamata za podignute kredite u oblasti poljoprivrede“, obaveza Općine Kakanj je bila da korisniku podsticaja refundira kamate za cijeli otplatni period, pojedinačno za svaku godinu na kraju kalendarske godine, po dostavljanju potvrde od banke o uplaćenim kamatama. Za ovaj podsticaj je primljeno, obrađeno i odobreno 9 zahtjeva i isplaćen podsticaj u iznosu od **12.141,34 KM**;
- Podsticaj za sufinansiranje projekata udruženjima poljoprivrednih proizvođača u cilju razvoja i unapređenja poljoprivrede na području općine Kakanj je isplaćen u iznosu od **30.000,00 KM**. Jedno udruženje je moglo aplicirati na samo jedan projekat u toku godine u maksimalnom iznosu do 5.000,00 KM. Obaveza Udruženja je bila da sufinansiraju predložene projekte u iznosu od 20% od vrijednosti projekta. Za ovaj podsticaj je primljeno, obrađeno i odobreno 6 zahtjeva od udruženja poljoprivrednih proizvođača;
- Podsticaj za sufinansiranje projekata laktofrizacije na području općine Kakanj je isplaćen u iznosu od **20.000,00 KM**. Udruženje uzgajivača krupne i sitne stoke „Farmeri“ Kakanj u saradnji sa agronomom uposlenikom Saveza poljoprivrednih udruženja „KAP“ Kakanj i veterinarskim stanicama sa područja općine Kakanj sačinili su Projekat laktofrizacije na području općine Kakanj. Projekat se bazira na nabavci neophodne opreme - laktofriza, s ciljem da se postigne što bolji kvalitet i higijena mlijeka. U 2018. godini proizvodnja svježeg kravljeg mlijeka na području općine Kakanj koje su otkupljene od 4 registrirana otkupljivaca mlijeka iznosila je **833.646** litara, što je u odnosu na 2017. godinu veća za cca 70.000 litara, a u narednom periodu očekuje se još veća proizvodnja mlijeka. Međutim, imajući u vidu visoke standarde EU za izvoz mlijeka, uz povećanje proizvodnje svježeg kravljeg mlijeka neophodna je i što bolja kvaliteta i higijena mlijeka, te je nabavka laktofriza opravdana i veoma bitna. Ovim projektom je nabavljeno i podjeljeno **6 laktofriza** najvećim proizvođačima svježeg kravljeg mlijeka sa područja općine Kakanj, te poljoprivrednim proizvođačima koji su registrovali poljoprivredu kao osnovnu djelatnost. U proceduri je nabavka još **3 laktofriza**;
- Nabavka izložbenih stolova za promociju poljoprivrednih proizvoda na sajmovima. Imajući u vidu da će se izložbeni stolovi voditi kao stalno sredstvo Općine Kakanj, njihova nabavka je isplaćena iz Budžeta Općine Kakanj sa pozicije „Nabavka stalnih sredstava i opreme“ (6.571,77 KM);
- Podsticaj za Izvještajno-prognoznu službu je isplaćen u iznosu od **1.884,54 KM**. Sredstva su utrošena za servisiranje CDA 3 uređaja (agrometeoroloških stanica), nabavku repromaterijala (feromonske klopke, ljepljive ploče, oprema za potrebe rada IPS-a i dr.), zatim za teoretske i praktične edukacije iz oblasti poljoprivrede, te nepredviđene aktivnosti u oblasti poljoprivrede i zaštite bilja. Za ovaj podsticaj je primljeno, obrađeno i odobreno 9 zahtjeva;
- Podsticaj za medijsko predstavljanje poljoprivrede, sajmovi, studijske posjete, vezano za poljoprivredu i ruralni razvoj isplaćen je u iznos od **13.218,43 KM**. Sredstva su utrošena za promociju razvoja poljoprivrede općine Kakanj kroz organizaciju i učešće poljoprivrednika na manifestacijama, organizovanje okruglih stolova, odlazak poljoprivrednih proizvođača na studijske posjete i na druge sajmove izvan općine, za snimanje TV emisija iz oblasti poljoprivrede i nabavku cerade za izložbene stolove. Za ovaj podsticaj je primljeno, obrađeno i odobreno 14 zahtjeva.

U oblasti poljoprivrede Općina Kakanj je u 2018. godini isplatila 447.721,48 KM podsticajnih sredstava za ukupno 1.108 poljoprivrednih proizvođača. Ukupan iznos isplaćenih općinskih sredstava u

oblasti poljoprivrede za period 2013-2017. godina iznosi 1.451.445,92 KM, a ukupan broj korisnika za ovaj period iznosi 3.256.

Kontinuiranim povećanjem iznosa sredstava iz Budžeta Općine Kakanj za podsticaje u oblasti poljoprivrede, ova privredna grana se intenzivnije razvija na području općine Kakanj, a stanovništvo je sve više zainteresirano za ovu oblast, što pokazuje broj primljenih stranaka, kao i povećanje prinosa i prihoda u pojedinim oblastima poljoprivrede.

II RAZVOJ INFRASTRUKTURE

Najveći i najobimniji infrastrukturni projekti u 2018. godini bili su rekonstrukcija glavne gradske saobraćajnice i izgradnja nove sportske dvorane. Izgrađena je i još jedna (šesta po redu) zgrada socijalnog stanovanja za socijalno ugrožene porodice Roma. Također, okončani su radovi na izgradnji ambulante u Zgošći, te je realizirana i druga faza radova na izgradnji ambulante u Krševcu.

Kada je u pitanju cestovna infrastruktura izvršena je sanacija ceste od Grebena do Kučića, sanacija ceste kroz Papratnicu, rekonstrukcija ceste Brežani-Bištrani, sanacija ceste za Desetnik i u selu Desetnik, rekonstrukcija ceste za Čizmiće, sanacija ceste Poljani-Šeperci, rekonstrukcija ceste za Semetiš, sanacija ceste za Poprženu Goru, sanacija ceste u Sopotnici, rekonstrukcija lokalne ceste Zgošća-Tršće, izgradnja puta kroz Hrastovac, izgradnja puta za Trešnje (MZ Brnj), izgradnja puta za Mramor, izgradnja puta za Tičiće, rekonstrukcija puta prema džamiji u MZ Modrinje, rekonstrukcija puta u Bičeru (od Pozameta do kraja sela), izgradnja ceste Rošćevina-Vinogradi, rekonstrukcija ceste u Dumancu, sanacija ceste V. Trnovci-Počivale (djelimično realizovano), ljetno i zimsko održavanje lokalnih i nekategorisanih puteva (popravke, održavanje, čišćenje, posipanje abrazivnim materijalom i dr.)...

Tokom 2018. godine realizirani su radovi na izgradnji vodovoda Lučani, radovi na rekonstrukciji vodovoda Vukanovići, radovi na izgradnji vodovoda Bijele Vode i radovi na izgradnji kanalizacionog kolektora Crnač i Čizmići. U toku je nastavak izgradnje vodovoda Bijele Vode i nastavak izgradnje vodovoda Slapnica. Ugovoreni su i radovi na još nekoliko projekata. Radi se o rekonstrukciji vodovoda Lučani, te izgradnji kanalizacione mreže Bukovlje, Čobe i Safundžije.

U 2018. godini Općina Kakanj je nastavila sa ulaganjima sa ciljem rekonstrukcije mreže daljinskog grijanja. Tako je izvršena rekonstrukcija još jedne dionice mreže daljinskog grijanja od objekta "Real" do solitera 1, a vrijednost radova iznosila je oko **700.000,00 KM**.

Čine se maksimalni napor da se mreža daljinskog grijanja održava i rekonstruiše, premda takve aktivnosti zahtijevaju velika ulaganja. Posve je jasno da bi bez rekonstrukcije došlo do općeg urušavanja mreže daljinskog grijanja što bi za posljedicu imalo novo opterećenje za Kakanj u pogledu kvaliteta zraka.

Nastavljeno je i sa ulaganjima u projekte čiji je cilj postizanje energetske efikasnosti. Tako je za utopljanje nove sportske dvorane koja je izgrađena u Kakanju izdvojeno 150.000,00 KM. Sa ciljem postizanja energetske efikasnosti izdvojeno je i 53.000,00 KM za utopljanje ambulante Krševac. Za dovršetak projekta provođenja energetske efikasnosti Mjesnog doma Haljinići izdvojeno je 32.000,00 KM, dok je za povećanje energetske efikasnosti Mjesnog doma Bjelavići izdvojeno oko 15.000,00 KM.

Realizirani su i radovi na izgradnji javne rasvjete u Velikim Trnovcima i Varalićima (nabavka materijala), te sanacija javne rasvjete u naselju Papratno. U svrhu ugradnje LED rasvjete u MZ Bukovlje (Demiri-Čobe) izdvojeno je 19.150,00 KM, dok je za ugradnju LED rasvjete u MZ Dobož (Dobojska škola-Vinski put) izdvojeno 16.387,00 KM.

Projekat rekonstrukcije elektroinstalacija u samostanu Kraljeva Sutjeska i kapeli Čatići je realiziran 50 %.

Za izgradnju igrališta u Kučićima utrošeno je 19.164,60 KM

Za zimsko održavanje putnih pravaca na području općine Kakanj utrošeno je **308.576,63 KM**. Za dio cestovne mreže koja nije obuhvaćena redovnim održavanjem blagovremeno i ravnomjerno smo izvozili potrebnu količinu abrazivnog materijala šljake (ukupno izvezeno 653 tone šljake) i locirali na kritičnim mjestima cesta.

Za redovno i vanredno (ljetno) održavanje lokalnih i nerazvrstanih cesta utrošeno je **427.836,00 KM** (obnavljanje i zamjena kolovoznog zastora-asfalt: MZ Zgošća-most, MZ Tičići, Donji Kakanj-Tičići, MZ Varda, pristup ambulanti Brnjic, Kondžilo-Dom Brnjic, MZ Povezice, LC Željeznička stanica-Dumanac (krivina), MZ Ričica, Popržena Gora, Sopotnica, Dumanac, Papratnica, Bištrani-M. Trnovci; ojačanje kolovoza u svrhu obnove i povećanja nosivosti i kvaliteta vožnje-tampon: Kalfići-Crnač, Čizmići, MZ Bukovlje-Demiri-Brus, Kakanj-Kondžilo-Podborje-Brnjic, Laze-Radina-Pedići, Varalići, MZ Tršće-Vrtača, Makljen, MZ Veliki Trnovci-Počivale, Jasike, MZ Vukanovići, MZ Seoce-priključni putevi, MZ Banjevac-Vinski put, MZ Ričica-Podbijelavići-Živalji, ul. Rudi Čajevac, Kakanj, Kujavče, MZ Bičeri-put za pravoslavno groblje, Junuzovići, Kape, Zagrađe-Halnovići, Plandište, MZ Bištrani-OŠ "Omer Mušić"-Seoce, put za Barice, Poljani-Šeperci, pored stadiona FK Rudar, MZ Brežani-Tomašići, MZ Kraljeva Sutjeska-put za

Teševo, Trkno, Ratanj, MZ Nažbilj-put za Bastašiće, Lipnicu, MZ Slapnica-Maračići-Kulovići, Kubure-Rivišća, priključak na ZPO (pored Poleta), MZ Papratnica-put za Sebinje, MZ Čizmići, Slivanj, put za Mijoče, odvojak za Turbe, MZ Varda, Groce, Sopotnica, MZ Haljinići, ispred sportske dvorane Kakanj, Rošćevina, Bištrani-M.Trnovci (do raskrsnice prema Baricama); održavanje bankina, usjeka i nasipa: Kakanj-Kondžilo-Podborje-Brnjic, Ul. ZPO, MZ Nažbilj, MZ Crnač, Dubovo Brdo-Drijen, Greben-Kučići, Donji Kakanj-Tičići; čišćenje kolovoza i objekata za odvodnju: Poljani, Trkno, Kakanj-Tršće-Ponijeri, Mramor, Greben-Kučići, ambulanta Krševac-Podborje, Ratanj; postavljanje zaštitne ograde: Varalići-drveni most, MZ Zagrađe, MZ Modrinje, MZ Brnj, MZ Bištrani-put prema Baricama, Greben-Kučići, Tršće-Ponijeri, MZ Tičići; poboljšanje sistema odvodnje cesta: MZ Seoce, Brežani-Bištrani, Seoce-V. Trnovci, MZ Brnj-Trešnje, LC Raskrsnica Tršće-Zagrađe, MZ Bukovlje-pored mezarja Šargan, MZ Kučići, MZ Kakanj (iza boračke zgrade), MZ Papratnica, MZ Varda, Sopotnica, Rošćevina-Vinogradi, kod ambulante Krševac, Tršće; sanacija potpornih i obložnih zidova uz cestu: ulica Omera Maslića, MZ Papratnica; manji zahvati na saniranju klizišta i odrona: LC Kraljeva Sutjeska-Poljani; košenje trave: Kakanj-Tršće-Ponijeri; hitne intervencije: drveni most Kondžilo-Brnjic, drveni most "Benat", betonski most na skretanju za Javor, sanacija puta usljed vremenskih nepogoda u Gornjim Lučanima i Ribnici). Za sufinansiranje prijelaza puta preko željezničke pruge na području općine Kakanj utrošeno je 12.130,00 KM, za projektovanje i nadzor 6.912,80 KM, za izvođenje radova na izgradnji odvodnih i drenažnih kanala i sanaciji klizišta uz put ka poduzetničkoj zoni "Vrtlište", u cilju zaštite i održavanja putne komunikacije prema zoni i održavanju prohodnosti iste, utrošeno je 22.086,20 KM.

Tokom 2018. godine poduzete su i slijedeće aktivnosti: izrada horizontalne signalizacije u gradu, izrada i postavljanje vertikalne saobraćajne signalizacije u gradu i mjesnim zajednicama, postavljanje i skidanje montažno-demontažnih usporivača brzine na saobraćajnicama, rekonstrukcija stepeništa, ograda i rukohvata, održavanje urbane opreme u gradu i nabavka nove, održavanje postojećih fontana, održavanje spomen obilježja, nabavka i montaža tabli za obilježavanje naseljenih mjesta i kućnih brojeva, dekoracija općine (postavljanje transparentata i zastava za državne, međunarodne i vjerske praznike i ukrašavanje područja općine, te nabavka novih transparentata i zastava)...

III ZAŠTITA ŽIVOTNE SREDINE

Općina Kakanj je odlučna u namjeri da kontinuiranim mjerama i akcijama, prostor općine učini još ljepšim i ekološki čistim, te osigura visok nivo komunalne higijene na području cijele općine. U saradnji sa JP "Vodokom" Kakanj svakodnevno se realiziraju aktivnosti na proširenju mreže sistema prikupljanja i odvoza otpada na teritoriji općine Kakanj. Tokom 2018. godine izvršeno je dodatno proširenje obima organiziranog odvoza otpada na MZ Vukanovići i organizovan je odvoz sa Ponijera. Planirano je da se narednih godina povećava opseg odvoza otpada i da u konačnici obuhvati sve mjesne zajednice na području općine. Za sufinansiranje odvoza u udaljenim mjesnim zajednicama na koje se proširio organizovani odvoz, kao i na izletiste Ponijeri utrošeno je **49.327,56 KM**.

Nakon izvršene ugradnje 33 podzemna kontejnera na 16 lokacija, možemo istaći da se komunalna higijena grada podigla na viši nivo, a također je smanjeno prisustvo pasa lualica na ulicama. Građani su veoma pozitivno prihvatili nove kontejnere, te se slika grada uveliko popravila što se tiče komunalne higijene i dosadašnjeg načina odlaganja komunalnog (kućnog) otpada. Za održavanje podzemnih kontejnera u 2018. godini utrošen je iznos od 5.000,00 KM. Neophodno je u narednom periodu modernizovati postojeće kontejnere i otkloniti uočene nedostatke.

Općina Kakanj i JP „Grijanje“ nastavljaju u 2018. godini aktivnosti rekonstrukcije vrelovoda i širenje mreže daljinskog grijanja, tako da je u ime Općine Kakanj JP „Grijanje“ izvršilo implementaciju namjenskih sredstava u iznosu od 699.471,20 KM za pomenute aktivnosti.

U saradnji Općine Kakanj, NTV IC Kakanj, Radio Kakanj i nevladinih organizacija koje u svojim statutarnim ciljevima imaju oblast zaštite okoline, nastavljaju se aktivnosti na povećanju svijesti stanovnika općine Kakanj o potrebi zaštite životne okoline i podizanju nivoa ekološke svijesti kod svih građana Kakanja, a posebno kod djece i mladih. NTV IC Kakanj emituje ekološku emisiju "Eko plus" u realizaciji sa CEKOR Kakanj koja je snimljena sa učenicima kakanjskih osnovnih škola. Za pomenute aktivnosti Općina Kakanj je utrošila 6.000,00 KM. Prema javnom pozivu Općina Kakanj je za ekološke projekte izdvojila 17.000,00 KM (sufinansiranje projekata za zaštitu okoline NVO, škola i drugih u 2018. godini).

U proteklom periodu Općina je realizirala brojne mjere čiji je cilj postizanje standarda energetske efikasnosti. Slijede neke od aktivnosti na povećanju energijske efikasnosti objekata: ambulanta u MZ Krševac, Mjesni dom Haljinići, Mjesni dom Bjelavići i nova sportska dvorana u Kakanju. Urađen je i detaljni energijski pregled za višestambene objekte u Kakanju, odnosno za solitere 1, 2 i 3. Urađen je audit kao pretpostavka da se u narednom periodu uradi i utopljanje ova tri velika stambena objekta, s tim da su

sredstva za ovaj projekat rezultat sufinansiranja Fonda za zaštitu okoliša FBiH i Općine Kakanj (sredstva pribavljena apliciranjem Općine na javni poziv).

Pored utopljanja Općina Kakanj je realizovala i druge aktivnosti na poboljšanju energijske efikasnosti, kao što su ugradnja LED rasvjete u MZ Bukovlje (Demiri – Čobe), LED rasvjete u MZ Doboj (Dobojska škola – Vinski put), kao i ugradnja LED rasvjete na rekonstruisanoj glavnoj saobraćajnici i nastavak radova na osvijetljenju ski staze Ponijeri.

Za izgradnju biciklističke staze uz glavnu gradsku saobraćajnicu izdvojen je iznos od 122.744,02 KM, a za izgradnju Eko parka Tršće (faza I) iznos od 9.897,39 KM. U sklopu projekta OAZA izvedeni su radovi na izgradnji drenažnog sistema na pomoćnom stadionu FK Rudar, te pristupne saobraćajnice od ulice Melente Bošnjaka do sportskih terena. Za obnovu javne turističke infrastrukture na otvorenim objektima sportske rekreacije – ski lift Ponijeri, Općina Kakanj je u saradnji sa Ministarstvom za privredu ZDK opredjelila sredstva u iznosu od 73.938,44 KM (Ministarstvo za privredu 25.291,00 KM).

Tokom zimske sezone Općina Kakanj redovno vikendom, u periodima adekvatnog snježnog ambijenta, osigurava besplatan prijevoz za sve građane do kakanjske vazdušne banje i ski-centra Ponijeri.

U 2018. godini za ručno i mehaničko čišćenje, pranje, uklanjanje nečistoća sa gradskih i prigradskih javnih površina i saobraćajnica, te održavanje mreže odvodnje atmosferskih voda izdvojen je iznos od 394.992,26 KM, za unapređenje i održavanje javnih zelenih površina (gradskih i prigradskih) iznos od 125.229,76 KM, a za projekte održavanja i poboljšanja higijene i uređenje kontejnera i kontejnerskih mjesta, čišćenje vodnih objekata, deratizaciju i kafilerijske usluge izdvojen je iznos od 53.626,52 KM.

Sredstva su korištena i za finansiranje troškova rada mobilne stanice, u cilju obavještanja stanovnika općine Kakanj o kvalitetu, te potrebi primjene Plana mjera u slučajevima prekomjerne zagađenosti zraka na području ZDK.

Općina Kakanj je pionir i lider u uspostavi vlastitog i od privrede nezavisnog mjerenja kvaliteta zraka. Odsjek za zaštitu okoline Općine Kakanj pomoću vlastite mobilne monitoring stanice kontinuirano prati kvalitet zraka u Kaknju kako bi se, u slučaju potrebe, poduzele mjere na zaštiti zdravlja stanovništva. Praksa mjerenja kvaliteta zraka vlastitom mobilnom stanicom u Kaknju se primjenjuje od 2008. godine (punih 10 godina). Ukoliko se putem mobilne monitoring stanice zabilježi prekomjerna zagađenost zraka, uz istovremeno uspostavljenu stabilnu vremensku situaciju koja je karakteristična po sporom pomjeranju atmosferskog pritiska, slabom vjetru i pojačanoj temperaturnoj inverziji koja bi se mogla zadržati u narednih 48 sati, Operativni štab Općine Kakanj za primjenu Plana interventnih mjera u slučajevima prekomjerne zagađenosti zraka će proglasiti jednu od epizoda. Epizode koje Operativni štab može proglasiti su pripravnost, upozorenje i uzbuna. Podatke o kvaliteti zraka Odsjek za zaštitu okoline objavljuje na službenoj web-stranici Općine Kakanj www.kakanj.gov.ba, tako da su podaci svakodnevno dostupni građanima, novinarima, ekodruženjima i svim drugim zainteresiranim subjektima.

Povodom 22. septembra – Evropskog dana bez automobila u Kaknju je organizirana **biciklijada**, čime smo poslali poruku o potrebi smanjenja korištenja automobila obzirom na činjenicu da produkti sagorijevanja motora sa unutrašnjim sagorijevanjem sadrže široku lepezu otrovnih gasova.

Namjenskim sredstvima za zaštitu okoline finansirane su i slijedeće aktivnosti: održavanje jednodnevnih volonterskih akcija Let's do it, finansiranje volonterske akcije u MZ Čatići – uređenje izletišta, uređenje i rekonstrukcija korita i obala rijeka i potoka na području općine Kakanj, nabavka LED displeja za promociju i edukaciju stanovnika općine u oblasti zaštite okoline, izrada Elaborata o zonama sanitarne zaštite i zaštitnim mjerama za vodozahvat Bukovica Kakanj za javno vodosnabdjevanje vodom stanovništva, izrada projektne i priprema tenderske dokumentacije za uklanjanje ostataka građevine, saniranje lokacije, uređenje zelene površine i oveljenjavanje trga u Kraljevoj Sutjesci, otplata kredita (rata) za vodosnabdjevanje stanovnika općine Kakanj i dr.

Ukupna ulaganja Općine Kakanj u segment zaštite okoliša u 2018. godini iznose 2.343.763,15 KM.

IV KULTURA, SPORT, OBRAZOVANJE, MLADI I NVO

U toku 2018. godine u JU KSC realizirano je **46** pozorišnih aktivnosti, što je više za 6 u odnosu na 2017. godinu. Posebno veliki uspjeh predstavlja činjenica da se od pomenutih 46 aktivnosti čak **36** odnosi na one koje su nastale u produkciji ili koprodukciji JU KSC što je najveći uspjeh do sada.

Dramski studio i Škola glume, koji djeluju pri Ustanovi su zabilježili 6 premijera, 4 u vlastitoj produkciji i 2 predstave nastale u koprodukciji. U 2018. godinu, prvi put u historiji Ustanove, na procesu nastanka predstave angažiran je profesionalni/akademski režiser Hari Šečić iz Sarajeva. Dokaz uspješne pozorišne scene je i nekoliko nagrada dodijeljenih Dramskom studiju i Školi glume na festivalima u Konjicu. Od 29 polaznika Škole glume 26 je završilo 9. ciklus što je najmanji broj odustajanja polaznika. U 10. ciklus su upisana 32 polaznika.

Sa predstavama “Ludilo udvoje”, “Fejzbukovci”, “Kamenje” i “Emigranti” zabilježeno je 12 gostovanja: Zenica, Tuzla, Lukavac, Hadžići, Živinice... Predstava “Kamenje” je imala i 2 internacionalna igranja u Beranima (Crna Gora) i Beogradu (Srbija). Osim predstava nastalih u produkciji JU KSC, u Domu kulture Kakanj ukupno je odigrano i 10 gostujućih predstava pozorišta iz Zenice, Sarajeva i Tuzle.

Tri ustanove – JU KSC Kakanj, Bosansko narodno pozorište Zenica i Centar za kulturu Zavidovići pokrenule su projekat pod nazivom “Glumački kamp”. Prvi kamp je održan u Kamenici (Zavidovići), a slijedeći će biti održan na Ponijerima.

U prostorijama JU KSC, u 2018. godini, upriličene su ukupno **142** filmske projekcije. U okviru VIVA film festivala upriličeno je 119 projekcija. Ostvarena je i saradnja s Operacijom kino SFF-a Sarajevo. Ustanova je bila i suorganizator Festivala kratkog filma u saradnji s Dnevnom centrom za djecu i odrasle s posebnim potrebama Dobrinje. U okviru ovog festivala prikazano je 5 projekcija u kojima su glumila djeca i odrasli sa posebnim potrebama.

I u 2018. godini Muzički centar je djelovao kroz program časova gitare i klavira, a osnovana je i horska sekcija. Muzički centar pohađa **100 polaznika** u 3 sekcije. Polaznici Muzičkog centra u saradnji sa polaznicima Škole glume su imali impresivne nastupe na svečanim akademijama povodom Dana državnosti BiH i Dana rudara.

Ustanova je ostvarila saradnju sa Udruženjem “Alternative” Kakanj koje u Omladinskom centru realizira “Kreativne radionice” za djecu i mlade. Ova saradnja rezultirala je i projektom pod nazivom “KICK” kroz koji će se preurediti i opremiti novom opremom prostorije Omladinskog centra koji će postati kreativni centar za mlade poduzetnike i inovatore.

U 2018. godini Ustanova je realizirala i događaj pod nazivom “Kakanj Fashion Night”, a upriličeno je i 12 koncerata.

Sektor obrazovanja iz godine u godinu bilježi porast broja polaznika.

Uz redovne aktivnosti, Muzej Kaknja je u 2018. godini imao i **58** vanrednih aktivnosti (okrugli stolovi, promocije, obilasci lokaliteta važnih za historiju BiH, popis stećaka, obilježavanje važnih datuma i događaja...). U 2018. godini u Muzeju Kaknja je zabilježeno 2.500 posjeta.

I u 2018. godini Ustanova je bila organizator i suorganizator brojnih sportskih dešavanja od čega izdvajamo Ligu mjesnih zajednica u malom nogometu (najmasovnije sportsko takmičenje sa 350 učesnika koje je trajalo 3 mjeseca), te Novogodišnji turnir u malom nogometu (najkvalitetnije i najmasovne do sada, i sa najvećim nagradnim fondom).

Ustanova je bila i domaćin važnih sportskih događaja. Izdvajamo završnicu kupa BiH u košarci i odbojci za muškarce, kvalifikacionu utakmicu ženske odbojkaške reprezentacije BiH koja je u Kaknju igrala protiv Latvije, Rudarijadu – sportsko takmičenje rudara, te nastup kakanjskih kuglaša koji su u okviru Lige prvaka ugostili ekipu njemačkog “Zerbsta”.

U okviru Kulturno-sportske manifestacije “Kakanjski dani 2018” organizirano je 14 sportskih aktivnosti od čega posebno izdvajamo uličnu trku “Kakanj za 5”.

U Ski-centru Ponijeri organiziran je doček Nove godine, te tradicionalna manifestacija “Udahni Ponijere” u okviru koje je upriličena utrka u veleslalomu za osnovne i srednje škole, kao i za pojedince, te zabava za djecu. Na Ponijerima je organizirana i škola skijanja.

U 2018. godini Ustanova je nabavila motorne sanke za Ski-centar Ponijeri, kombi vozilo, mobilijar za kulturni školski caffè bar “Evropa”, školske klupe i stolice... Nabavljeno je ozvučenje za sportsku dvoranu, izvršena je zamjena stolarije na ulazu u sportsku dvoranu, uređene su prostorije u upravnoj zgradi, kupljene su konferencijske stolice...

Izdvajanja Općine Kakanj za sport u 2018. godini iznose oko **1.000.000** KM što je veliki uspjeh za jednu lokalnu zajednicu koja broji oko 38.000 stanovnika. U toku 2018. godine ostvarena je saradnja sa svim sportskim klubovima i udruženjima iz oblasti sporta kroz razne aktivnosti. Pružena je finansijska podrška za odlazak na državna i federalna prvenstva, međunarodne turnire, evropska i svjetska prvenstva kakanjskih klubova i takmičara. U saradnji sa JU KSC, Društvom pedagoga i Sportskim savezom općine Kakanj organizovane su Male olimpijske igre za učenike OŠ i SŠ u košarci, odbojci, rukometu i malom nogometu. Učestvovala su sve osnovne i srednje škole. Također, u saradnji sa Sportskim savezom Općine Kakanj realizovana je manifestacija Izbor sportiste općine Kakanj za 2017. godinu.

U 2018. godini u Kaknju je izgrađena nova sportska dvorana koja je kakanjskom sportu, uz kapacitete postojeće dvorane, donijela još jedan teren za basket, te teren za nogomet/rukomet/odbojku, ali i 10 svlačionica, fitnes/teretanu... Preostalo je još izvršiti nabavku mobilijara i sportskih rekvizita za novu dvoranu. Izgradnju sportske dvorane u čiju izgradnju će u konačnici biti uloženo oko **1.500.000,00** KM zajedno su finansirali Općina Kakanj i Vlada ZDK. Velike zasluge za uspjeh kakanjskog sporta ima i kakanjska privreda koja izdvaja velika novčana sredstva za sport.

Općina Kakanj svake godine dodjeljuje **stipendije i studentima i učenicima srednjih škola**, što je rijetkost jer stipendije za studente obično dodjeljuju kantonalna ministarstva koja su nadležna za oblast obrazovanja, dok su rijetke ili gotovo da nema lokalnih zajednica koje stipendiraju učenike srednjih škola.

Tokom 2018. godine Općina Kakanj je izvršila sve obaveze u pogledu isplate općinskih stipendija za **200** učenika srednjih škola (visina stipendije po učeniku 300,00 KM) i **136** studenata (visina stipendije po studentu 800,00 KM). U svrhu isplate općinske stipendije za studente u 2018. godini izdvojeno je 155.000,00 KM, dok je za đачke stipendije izdvojeno 60.000,00 KM. Isplaćena je i razlika stipendije za 189 studenata koji su dobili kantonalnu stipendiju i za tu svrhu je izdvojeno 44.880,00 KM. Naime, iznos kantonalne stipendije je manji od iznosa općinske, ali je Općina Kakanj isplatila razliku tako da su svi studenti dobili po 800,00 KM koliko iznosi općinska stipendija.

Kakanjski studenti koji ostvaruju izvanredne rezultate pravo na stipendiju ostvaruju automatski bez bodovanja. Također, automatski bez bodovanja pravo na stipendiju ostvaruju i učenici srednjih škola – djeca sa posebnim potrebama, djeca poginulih rudara i djeca iz populacije Roma. Učenik srednje škole koji ponese titulu učenika generacije ostvaruje, automatski bez bodovanja, pravo na stipendiju za prvu godinu studija. Svake godine dodjeljuju se novčane i druge nagrade za učenike koji ostvare zapažene rezultate na školskim takmičenjima i za učenike generacije.

Novitet je i sufinansiranje troškova doktorskog studija za nadarene studente sa područja općine Kakanj. Za ovu svrhu je planirano je 35.000,00 KM.

Općina Kakanj finansira i **prijevoz učenika** i studenata u iznosu od 100% ili 50% u ovisnosti od socijalne karte porodice kojoj učenik pripada. U školskoj 2017/2018. pravo na ovu povlasticu ostvaruje **207 učenika i 23 studenta**. Općina Kakanj finansira i prijevoz za 22 djece s invaliditetom.

Općina je podržala i realizaciju projekata osnovnih i srednjih škola u ukupnom iznosu od **23.410,35 KM**.

Općina finansira i organiziranje **općinskih takmičenja** osnovaca i srednjoškolaca, te obezbjeđuje novčane nagrade za najbolje učenike sa takmičenja, te za učenike generacije osnovnih i srednjih škola. Za učenike generacije osnovnih i srednjih škola isplaćuje se nagrada u novčanom iznosu od **200,00 KM**.

Provedena je kompletna procedura za odabir izvođača radova na rekonstrukciji krova OŠ „Rešad Kadić“ u Brnjicu. Za ovu namjenu opredijeljena sredstva ZDK iznose **60.000,00 KM**.

Općina Kakanj redovno finansira rad Javne ustanove za predškolski odgoj i obrazovanje “Mladost” Kakanj, a obaveza roditelja je da plaćaju **samo 50,00 KM mjesečno**.

U 2018. godini provedena je procedura **prijema 29 lica na stručno osposobljavanje ili pripravnika (VSS) u privatnom sektoru**, a koje se finansira iz Budžeta Općine Kakanj.

U narednom periodu, zajedno sa mladima nastavljamo organizirati sportska takmičenja i koncerte za mlade, te sponzorirati njihove aktivnosti (izložbe, revije, omladinska poduzetništva i sl.). Nastavlja se i saradnja sa udruženjima mladih, Vijećem mladih i Komisijom za mlade.

Tokom 2018. godine, svi **značajni datumi iz prošlosti Kakanja i BiH** su dostojanstveno obilježeni ("Dan nezavisnosti BiH", „Dan državnosti BiH“, „Dan Općine Kakanj“, „Dan Armije BiH“, „Dan policije“, Kulturno-sportska manifestacija “Kakanjski dani 2018”, „Dječija nedjelja“, „Dječija nota“, značajni datumi i manifestacije iz perioda odbrambeno-oslobodilačkog rata 1992.-1995. godina i NOR-a ...). Općina je podržala odlazak djece na Kid's festival u Sarajevo, organiziran je doček Nove 2018. godine i dr.

U cilju unapređenja partnerskih odnosa između lokalne vlasti i civilnog društva iz Budžeta Općine Kakanj za 2018. godinu **finansirano je 13 projekata nevladinih organizacija i udruženja građana** iz različitih oblasti (kultura, zdravstvo i socijalna zaštita, obrazovanje, građansko društvo...). Ukupno utrošena sredstva za navedene projekte iznose **29.940,00 KM**. Finansijska podrška Općine Kakanj u **radu udruženja nacionalnih manjina** iznosila je **12.000,00 KM** (podržano 8 projekata). Transfer za **omladinske projekte** realizovan je u iznosu od **10.000,00 KM** (podržano je ukupno 4 projekta udruženja mladih). Provedena je sva potrebna procedura za učešće u projektu UNDP-a – Regionalni program lokalne demokratije, te je izvršen odabir projekata za sufinansiranje, kao i monitoring. Takođe, **vjerskim zajednicama** su obezbijedena sredstva u općinskom budžetu (**37.000,00 KM**), te pružen svaki drugi vid potrebne podrške.

V BORAČKO – INVALIDSKA, ZDRAVSTVENA I SOCIJALNA ZAŠTITA

Iako nadležnost za pružanje pomoći boračkim populacijama imaju ministarstva za boračka pitanja ZDK i FBiH, Općina Kakanj nastoji da iz svog budžeta pomogne ovoj populaciji. Tokom 2018. godine za jednokratne novčane pomoći boračkim populacijama isplaćeno je **107.446,27 KM**. Osim toga, Općina Kakanj finansira i rad boračkih udruženja, koja kroz svoj rad, iz dijela sredstava koja dobiju od Općine, pomažu pripadnicima boračkih populacija, te realiziraju aktivnosti koje su usmjerene na zaštitu tekovina Odbrambeno-oslobodilačkog rata 1992-1995. Budžetom Općine Kakanj za 2018. godinu usvojen je iznos od **153.500,00**

KM za rad boračkih udruženja (utrošeno 91.212,00 KM za rad boračkih udruženja, te 54.319,64 KM - neplanirani troškovi za rad udruženja).

U 2018. godini sa **federalnog nivoa** korisnicima iz Kaknja, po osnovu porodičnih i ličnih invalidnina, isplaćeno je 1.914.806,85 KM. Sa **kantonalnog nivoa** realizirano je 71.250,00 KM u svrhu vanredne novčane pomoći boračkim populacijama, 69.000,00 KM za liječenje, 18.815,00 za dženaze/sahrane, 23.600,00 KM za kupovinu udžbenika djeci branitelja, 155.600,00 KM za boračke stipendije, 57.200,00 KM za samozapošljavanje i upošljavanje boračkih populacija, 135.269,74 KM za stambeno zbrinjavanje.

Sportsko društvo RVI „Kakanj 92“ je shodno Odluci Ministarstva za boračka pitanja ZDK ostvarilo pravo na iznos od 1.000,00 KM na ime pomoći u sufinansiranju nabavke sportske opreme, a realizovana su i sredstva u iznosu od 5.000,00 KM na ime dovršetka radova na spomen obilježju Donja Papratnica-izgradnja i postavljanje spomen ploče sa imenima.

Izdvajanje Ministarstva za boračka pitanja ZDK za braniteljsku populaciju sa područja Kaknja u periodu 2013-2017. godina ima kontinuirani rast (2013. godine 186.434,92 KM, 2014. godine 216.215,27 KM, 2015. godine 297.839,68 KM, 2016. godine 364.138,57 KM, 2017. godine 661.809,50 KM).

Svi **značajni datumi i manifestacije** iz perioda odbrambeno-oslobodilačkog rata 1992.-1995. godina i NOR-a (obilježavanje dana „Armije RBiH“, dana "Zlatnih ljiljana", dana „Dana patriotske lige“, spomena „Kamenica-Popova Luka“, spomena „Misoča“, spomena „Semizovac“, dana „RVI“, godišnjice 309. brdske brigade, dana poginulih civila Hrvata-Grmače 1993, dana poginulih civila Bošnjaka-Poljani 1993, 27. jula – Dana ustanka naroda i narodnosti BiH, turnira za Dan šehida i poginulih boraca, godišnjice formiranja OPŠO i 311. lahke brigade, organizovanje obilježavanja spomena Srebrenica, obilježavanje godišnjice 7. muslimanske brigade, obilazak i godišnjica polaganja kamena temeljca u Sanskom Mostu, organizacija turnira za Dan šehida i poginulih boraca i dr.), u Kaknju se obilježavaju na dostojanstven način, a glavni finansijer organizacije obilježavanja je Općina Kakanj.

U saradnji sa NTV IC Kakanj, Općina je sufinansirala Projekat „Da se ne zaboravi“ u iznosu od 6.000,00 KM. Također, u saradnji sa MZ Podgora rekonstruisana je spomen česma šehidima u Sopotnici, gdje je uloženi novčani iznos od 1.000,00 KM.

Za sufinansiranje Službe hitne medicinske pomoći i Hemodijaliznog centra opredijeljena su sredstva u iznosu od **50.000,00 KM**, od čega 30.000,00 KM za rad jednog tima Hitne medicinske pomoći, 10.000,00 KM za rad Hemodijaliznog centra i 10.000,00 za projekte u svrhu poboljšanja zdravstvene slike stanovništva (u saradnji sa JU Dom zdravlja Kakanj organiziran je besplatan ultrazvučni pregled dojki za 200 žena).

Zajedno sa JU „Centar za socijalni rad“ Kakanj nastavlja se pružati podrška socijalno ugroženim kategorijama stanovništva naše općine (stalna novčana pomoć, druge materijalne pomoći, osiguranje jednog obroka dnevno u vrijeme nastave, troškovi sahrane, smještaj u JU za predškolski odgoj Mladost Kakanj i dr.) Iz Budžeta Općine Kakanj izdvajaju se značajna novčana sredstva za stalnu socijalnu pomoć. Putem Centra za socijalni rad Kakanj, isplaćuju se jednokratne novčane pomoći za porođaj (stimulacija nataliteta) i opremu novorođenog djeteta.

Općina pruža finansijsku podršku humanitarnim organizacijama. Osigurali smo sredstva za rad javne kuhinje „Merhamet“, namijenjena najugroženijoj kategoriji stanovništva. Za rad Crvenog križa u 2018. godini iz Budžeta Općine Kakanj izdvojena su sredstva u iznosu od **10.000,00 KM**.

Radno sposobna socijalno ugrožena lica, podržavamo podsticajima za samoupošljavanje u poljoprivredi ili obrtu.

I u školskoj 2018/2019. godini Općina Kakanj finansira užinu za djecu iz socijalno ugroženih porodica koje ostvaruju stalnu socijalnu pomoć. Za svako dijete izdvaja se po 1 KM za svaki radni dan tokom mjeseca. Sredstva se isplaćuju putem Centra za socijalni rad Kakanj.

Za pohađanje predškolskog odgoja za romsku i djecu iz socijalno – ugroženih porodica realizovana su sredstva u iznosu od **1.664,00 KM**.

U 2018. godini realizirani su i poslovi vezani za zdravstveno osiguranje učenika i studenata, samohranih majki i djece do polaska u školu.

Nastavili smo sa realizacijom projekta „**Stambeno zbrinjavanje Roma na području općine Kakanj**“ (u saradnji sa Ministarstvom za ljudska prava i izbjeglice BiH i organizacijom Caritas Švicarska), a u narednom periodu planirane su i aktivnosti u vezi stambenog zbrinjavanja drugih socijalnih kategorija stanovništva.

Općina Kakanj pruža finansijsku podršku Centru za djecu sa posebnim potrebama Zenica, Dnevnom centru za djecu i odrasle osobe sa posebnim potrebama ZDK u Visokom i UG Medica Zenica (sufinansiranje sigurne kuće, odnosno projekta „Zbrinjavanje žrtava nasilja u porodici“). Također, Općina sufinansira i prijevoz za **17** korisnika JU Centar za djecu i odrasle osobe sa posebnim potrebama u Dobrinju, kao i **6** učenika sa posebnim potrebama koji pohađaju OŠ „Hamdija Kreševljaković“ i Dnevni centar u Zenici. Za ovu namjenu opredijeljena su sredstva u iznosu od **20.000,00 KM**.

Pomoć za raseljene i povratnike, te potporu obnove i izgradnje povratnicima iz Budžeta Općine Kakanj za 2018. godinu iznosila je **64.680,00 KM**.

U 2018. godini nastavljena je implementacija Državnog projekta stambenog zbrinjavanja (DPSZ) u okviru Regionalnog stambenog programa (RSP) Pod-projekta BiH4 (2015) za obnovu/rekonstrukciju/sanaciju 3 stambene jedinice na području općine Kakanj.

Prvostepena komisija za izbor korisnika Regionalnog stambenog programa u općinama na području Federacije BiH, utvrdila je Preliminarnu listu potencijalnih korisnika iz kategorije povratnika iz R. Hrvatske u BiH za nastavak provedbe Državnog projekta stambenog zbrinjavanja na kojoj se nalaze 4 potencijalna korisnika za povratak na područje općine Kakanj.

VI CIVILNA ZAŠTITA I SIGURNOST GRAĐANA

U saradnji sa mjesnim zajednicama realizirani su poslovi nabavke, transporta i isporuke cijevi i drugog materijala za poduzimanje palijativnih mjera na klizištima, a u tu svrhu je angažirana i mehanizacija. Građevinski materijal i cijevi su dodjeljivani u skladu sa zahtjevima i potrebama mjesnih zajednica i građana, a dodjela se uglavnom vršila za potrebe sanacije i zaštite oštećenih i ugroženih infrastrukturnih objekata.

U 2018. godini izrađena je projektna dokumentacija za sanaciju klizišta „Crnačka stanica“ na putnoj komunikaciji Zgošća-Tršće. U periodu od maja do oktobra 2018. godine realizirane su palijativne mjere na klizištima u Kraljevoj Sutjesci i Tršću, te u Ulici Omera Maslića. Provedena je i javna nabavka za izbor ponuđača za izradu Elaborata o geotehničkim karakteristikama zemljišta „Vrtače“ u MZ Tršće. Radi se o starom kompleksnom klizištu površine 6 hektara, a istraživanje je neophodno za izradu kompletnog projekta sanacije koji bi trebao uključiti putnu komunikaciju Kakanj-Tršće, kao i korito rijeke Zgošće.

U 2017. godini UNDP je pokrenuo „Projekat za oporavak od poplava“ za 18 općina u BiH među kojima je i Kakanj. U toku 2018. godine, nakon javnog poziva, izvršen je izbor korisnika za sanaciju i izgradnju novih stambenih objekata koji su oštećeni u poplavama 2014. godine. Izabrano je 11 korisnika za sanaciju i 7 za izgradnju novih stambenih objekata.

U 2018. godini Općinski štab civilne zaštite je donio odluke o davanju pomoći za 12 porodica-domaćinstava iz naselja „Bare“ za adaptaciju i sanaciju stambenih objekata radi povratka u svoje domove. Mještanima naselja „Bare“ koji su se vratili u svoje stambene objekte dodijeljena je pomoć u iznosu od **7.300,00 KM**.

Služba civilne zaštite u saradnji sa TUN timom, KUCZ i PS Kakanj vrši redovno obilježavanje i uklanjanje pronađenog zaostalog NUS-a. U toku 2018. godine prikupljeno je i predato: 14 ručnih bombi, 2 tromblonske mine, 1 mina 60 mm i 3 metka 40 mm (nitroglicerina).

Profesionalna vatrogasna jedinica Kakanj (PVJ Kakanj) je imala **114** intervencija u 2018. godini. Na svim intervencijama PVJ Kakanj je bila pravovremena, uspješna i efikasna do završetka akcije. U poređenju sa prethodnom godinom (**249** intervencija) može se konstatovati da je došlo do smanjenja ukupnog broja intervencija kakanjskih vatrogasaca.

Služba civilne zaštite tokom cijele godine, a posebno u proljetnim mjesecima poduzima niz mjera u cilju smanjenja ove pojave. Redovno se vrši obavještanje i upozoravanje građana putem lokalnih medija, upućuju dopisi savjetima mjesnih zajednica i relevantnim subjektima (Poliicijska stanica, Šumarija, inspekcije), kao preventivne mjere, a za pojedinačne slučajeve traži se od inspekcija da djeluju i represivno u cilju smanjenja ovih požara.

Učešće pravnih lica iz oblasti šumarstva koja gospodare i čuvaju šume u 2018. godini je bilo više nego skromno, i u oblasti prevencije i u oblasti represije u smislu utvrđivanja identiteta lica koja izazivaju šumske požare. Isto tako, skromni su i njihovi kapaciteti u oblasti vatrogastva.

U novembru 2018. godine izvršena je procedura za nabavku službenog vozila za Službu civilne zaštite. Radi se o vozilu Dacia-Duster, terenskom vozilu sa pogonom na sva četiri točka.

Općina Kakanj kontinuirano radi na materijalnom opremanju PVJ Kakanj radi izvršavanja zadataka iz oblasti zaštite od požara i vatrogastva. Provedena je i procedura javne nabavke za potrebnu opremu za PVJ (uniforme, šljemovi, čelična užad i sajle za intervenciju, oprema za spašavanje na vodi kao i druga oprema za rad jedinice, održavanje i servisiranje). Izvršena je i nabavka raspršivača za dezinfekciju prostora „IGEBA F-35“ zajedno sa dodacima i odgovarajućim sredstvom.

PVJ Kakanj je učestvovala na vježbi na nivou ZDK koja je održana u Jelahu.

Tokom 2018. godine izvršen je obilazak škola i obdaništa tokom kojeg je realizirana aktivnost upoznavanja djece sa zaštitom od požara, te osnovnim mjerama u slučaju požara i evakuacije. Upriličena je i pokazna vježba u OŠ „Omer Mušić“ Brežani.

U više navrata vršena je obuka stanovništva putem javnih emitera na području općine Kakanj u vidu obavještenja, upoznavanja sa propisima iz oblasti zaštite od požara i vatrogastva, kao i zaštite i spašavanja zbog prirodnih ili drugih nesreća.

Realizirana je i saradnja sa udruženjima od posebnog značaja za sistem civilne zaštite (Radio-klub, Crveni križ, Udruženje „Vatrogasno društvo Kakanj“ Kakanj).

U protekloj godini nastavljene su aktivnosti u vezi podizanja nivoa sigurnosti građana i zaštite njihove imovine. Zalagali smo se za sve aspekte sigurnosti u svim segmentima života od imovine, saobraćaja, dječije igre, šetnje, vožnje biciklom..., te podsticali građane na veću saradnju sa policijskim organima radi efikasnije zaštite.

VII LOKALNA UPRAVA – OPĆINSKE SLUŽBE KAO SERVIS GRAĐANA

U proteklom periodu uspostavljena je efektivna, efikasna i odgovorna općinska uprava prilagođena potrebama građana i poslovnih subjekata, kako bi efikasnije i jednostavnije ostvarivali svoja prava i izvršavali svoje obaveze. Razvijajući koncept savremenih administracija koji kaže “Putuju podaci, a ne građani”, odnosno uspostavljanjem elektronske uprave poboljšali smo protok informacija unutar administracije, te prema građanima i poslovnim subjektima. Imamo neposredan uvid u trajanje svakog predmeta, kao i grupa predmeta po uposlenim, po odjelima i službama, kao i administraciju u cjelini.

Općina Kakanj je i tokom 2018. godine uspješno prošla nadzorni audit, čime je potvrđeno da je Općina efektivno primjenila planirani sistem upravljanja (**ISO 9001:2008**), da je sistem upravljanja sposoban ostvariti ciljeve i politiku organizacije, te da je u skladu sa zahtjevima standarda. Potvrda nadzornog audita da se poštuje standard ISO 9001:2008, za Općinu Kakanj predstavlja veliku čast i zadovoljstvo, ali i obavezu da se nastavi putem kontinuiranog poboljšanja kvalitete pružanja usluga građanima općine Kakanj.

Općinu Kakanj su posjetili brojni predstavnici diplomatskog, političkog, privrednog i kulturnog života. Općinski načelnik je svakodnevno u svom uredu održavao sastanke sa predstavnicima svih relevantnih institucija koje mogu pomoći u realizaciji razvojnih planova u općini Kakanj (**725** prijema u Kabinetu Općinskog načelnika).

Uzeli smo aktivno učešće i u radu Saveza općina i gradova FBiH, te nastavili saradnju sa drugim općinama, kako u zemlji tako i u inostranstvu.

U protekloj godini pokrenuto je **4.752** prvostepenih upravnih postupaka (3.816 na zahtjev stranke i 936 po službenoj dužnosti). U Centru za pružanje usluga zabilježeno je oko 131.592 posjete. Izvršeno je 118.291 ovjera potpisa, rukopisa i prepisa, izdato 25.000 izvoda iz matičnih knjiga, izvršeno 468 upisa u matičnu knjigu rođenih, 280 upisa u matičnu knjigu vjenčanih, te 406 upisa u matičnu knjigu umrlih. Završeno je ažuriranje centralnog biračkog spiska Općine Kakanj.

Izrađen je Izvještaj o infrastrukturnim ulaganjima po mjesnim zajednicama općine Kakanj u posljednjih 10 godina, te Izvještaj o infrastrukturnim potrebama mjesnih zajednica općine Kakanj za naredni period.

U 2018. godini Odsjek za inspekcije Općine Kakanj je izvršio ukupno **6.820** inspekcijskih radnji što je za 345 više u odnosu na 2017. godinu. Ukupna vrijednost novčanih kazni u 2018. godini koje se uplaćuju u budžet iznosi 43.170,00 KM što je za 7.420,00 KM više u odnosu na 2017. godinu. Poduzeto je 660 preventivnih i 529 represivnih mjera. Po planu inspekcijskog nadzora poduzeto je 475 inspekcijskih pregleda, dok je po zahtjevu građana poduzeto 296 inspekcijskih pregleda. Po anonimnim prijavama građana poduzeto je 169 inspekcijskih pregleda. Izdato je 126 rješenja o obavezi registracije vlasničkih pasa (prema prethodno pribavljenom spisku predsjednika savjeta MZ), sačinjena baza podataka vlasnika kotlovnica u I zoni GGZ... Za potrebe Odsjeka za inspekcije izvršena je i nabavka uređaja “Luminometar PD 30” za kontrolu higijene u gostiteljskim objektima i na drugim mjestima.

U 2018. godini Odsjek za imovinsko-pravne poslove rješavao je 4 predmeta utvrđivanja javnog interesa, 89 potpune eksproprijacije, 68 nepotpune eksproprijacije, 4 predmeta prodaje nekretnina u skladu sa Zakonom o stvarnim pravima Federacije BiH, 1 predmet zamjene zemljišta, 6 predmeta utvrđivanja prava vlasništva po članu 61. Zakona o građevinskom zemljištu Federacije BiH, 1 predmet utvrđivanja gubitka prava korištenja iz ranijih godina, 1 predmet uzurpacije zemljišta iz ranijih godina, 5 zahtjeva za vraćanje imovine u vlasništvu građana, donio 5 rješenja o produženju rješenja o imenovanju prinudnog upravitelja zgrade, zaključio 2 Ugovora o upravljanju stambenim zgradama (do sada su zaključeni ugovori sa upraviteljima za 140 zgrada-ulaza u Kakanju). Odsjek je radio i na realizaciji projekta izgradnje stambene zgrade socijalnog stanovanja sa 6 stanova u naselju Varda u saradnji s “Caritasom” Švicarske. U toku su i pripreme novog projekta izgradnje zgrade socijalnog stanovanja sa 10 stanova.

U Odsjeku za geodetske poslove i katastar nekretnina redovno se rješavaju predmeti po zahtjevima, te se vrši održavanje premjera i utvrđivanje nastalih promjena na zemljištu. Izvršena je i harmonizacija 3 katastarske općine (Čatići, Kakanj i Doboj, od ukupno 40 katastarskih općina) sa ukupno 9.846 parcela za

pilot-projekat Federalne geodetske uprave. U 2019. godini od strane Federalne geodetske uprave planirani smo u projektu uspostave digitalnog arhiva, a nastavljaju se i aktivnosti harmonizacije u nove 4 katastarske općine.

U 2018. godini donešeno je 132 rješenja o urbanističkoj saglasnosti, 205 rješenja o korištenju javnih površina, 56 rješenja o odobrenju za građenje, 20 rješenja o odobrenju za upotrebu objekta-tehnički prijem objekata, 10 rješenja o legalizaciji bespravno sagrađenih objekata, te izdato 64 uvjerenja o činjenicama o kojima se vodi evidencija, o starosti objekta i dr.. U Odsjeku za urbanizam izrađena je Odluka o poticajima i pogodnostima za investiranje na području općine Kakanj, Odluka o visini prosječne konačne građevinske cijene jednog metra kvadratnog korisne stambene površine iz prethodne godine, Odluka o izmjeni i dopuni Urbanističkog plana Kaknja 2011.-2026., Odluka o davanju saglasnosti za utvrđivanje namjene, parcelaciju mikrolokaliteta i formiranje građevinske čestice...

U Odsjeku za lokalni ekonomski razvoj (upravno rješavanje u oblasti poduzetništva) izdato je ukupno 278 rješenja, 75 uvjerenja i 7 zaključka o obustavljanju postupka, i to u sljedećim oblastima: trgovina (45 rješenja: 28 odobrenja za rad, 14 rješenja o trajnoj odjavi djelatnosti i 3 rješenja o promjeni rada i proširenja predmeta poslovanja), ugostiteljstvo (40 rješenja: 13 odobrenja za rad, 16 rješenja o trajnoj odjavi djelatnosti, 8 rješenja o utvrđivanju minimalnih uslova u poslovnom prostoru i 3 rješenja o proširenju predmeta poslovanja), obrt i srodne djelatnosti (134 rješenja: 71 odobrenje za rad - 40 rješenja iz oblasti obrta i srodnih djelatnosti i 31 rješenje o obavljanju poljoprivredne djelatnosti, te 55 rješenja o trajnoj odjavi djelatnosti), javni prijevoz tereta (2 odobrenja za rad i 6 rješenja o trajnoj odjavi djelatnosti, 16 rješenja o promjeni rješenja radi promjene vozila), prijevoz za vlastite potrebe (19 rješenja: 7 rješenja o djelatnosti i 4 rješenja o trajnoj odjavi djelatnosti, 8 rješenja o promjeni vozila), taksi prijevoz (13 rješenja: 4 rješenja o trajnoj odjavi, 9 rješenja o promjeni vozila). U oblasti saobraćaja izdato je 54 dopunske oznake za taksivozila, 12 uvjerenja o ispunjavanju uslova za dodjelu dopunskih oznaka za taksivozila, 12 uvjerenja o izdatim dopunskim oznakama za taksivozila, 2 rješenja za prekopavanje ceste, 20 rješenja za ograničavanje saobraćaja, 18 rješenja za izvođenje radova, 21 rješenje za privremeno korištenje cestovnog zemljišta, 11 rješenja za postavljanje saobraćajne signalizacije, 2 rješenja za izgradnju priključka na javnu cestu, 1 rješenje za izdavanje saglasnosti za lokaciju, te 2 zaključka o obustavi postupka. Realizirane su aktivnosti vezane za provođenje postupka rasporeda taksivozila na taksistajalištima na području općine Kakanj za 2018. godinu (44 taksiprijevoznika).

U službeni registar pasa Općine Kakanj u 2018. godini je upisano 406 pasa.

U Odsjeku za boračka pitanja donešeno je 32 rješenja o priznavanju i prestanku prava na porodičnu invalidninu, 20 rješenja za ličnu invalidninu, 12 rješenja za priznavanje većeg procenta invalidnosti za maloljetne ratne invalide, obrađeno je 239 zahtjeva shodno Uredbi o vanrednoj novčanoj pomoći braniocima i članovima njihovih porodica, 195 zahtjeva za dodjelu novčane pomoći za nabavku obaveznih udžbenika za redovno obrazovanje u osnovnim i srednjim školama za branioce i članove njihovih porodica, 45 zahtjeva o rješavanju stambenog pitanja branilaca i članova njihovih porodica, 198 zahtjeva o proširenom obimu prava iz oblasti zdravstvene zaštite za branioce i članove njihovih porodica, 17 zahtjeva o pravu na zdravstveno osiguranje, 33 zahtjeva o medicinskoj rehabilitaciji branilaca i članova njihovih porodica u banjско-klimatskim lječilištima, 234 zahtjeva o stipendiranju branilaca i članova njihovih porodica za akademsku 2018/2019. godinu, 29 zahtjeva o naknadi troškova dženaze/sahrane branilaca i članova njihovih porodica, 10 zahtjeva za poticaj upošljavanja i samozapošljavanja pripadnika branilačke populacije, 1947 zahtjeva za jednokratnu novčanu pomoć, 2 zahtjeva za ostvarivanje prava na kiriju, izdato je 2581 uvjerenje o primanjima...

U 2018. godini Odsjek za izbjegla, raseljena lica i povratnike riješio je 9 zahtjeva za privremeni smještaj plaćanjem stanarine za raseljene osobe, 29 zahtjeva za plaćanje stanarine osobama koje su usljed prirodne nesreće iseljene iz svojih stambenih jedinica, 20 zahtjeva za jednokratnu novčanu pomoć za raseljenih lica i povratnike, 80 zahtjeva za pomoć raseljenim licima i povratnicima, izdato je 102 uvjerenja o statusu...

U izvještajnom periodu, Općinsko vijeće Kakanj je održalo 13 sjednica (12 redovnih i jedna svečana) i razmatralo 146 tačaka dnevnog reda. U toku 2018. godine Vijeće je razmatralo 5 prijedloga izmjena i dopuna Budžeta Općine Kakanj za 2018. godinu, 1 prijedlog izmjena i dopuna Odluke o izvršavanju Budžeta Općine Kakanj za 2018. godinu, te nacrt i prijedlog Budžeta i Odluke o izvršavanju Budžeta Općine Kakanj za 2019. godinu. Na programe i planove odnosilo se 25 tačaka. Na vijećničkim klupama našlo se 42 odluke. Usvojeno je 11 zaključaka, 35 izvještaja i 11 informacija. Donešeno je 4 rješenja koja se odnose na utvrđivanje prava vlasništva i 18 rješenja koje se odnosi na imenovanja i razrješenja članova Upravnih odbora javnih ustanova, članova Skupština javnih preduzeća i članova radnih tijela i komisija Vijeća. Postavljeno je 82 vijećnička pitanja, pokrenuto 100 inicijativa i dr..

Pored obavljenih poslova u pripremanju i održavanju sjednica Vijeća, u izvještajnom periodu Stručna služba za poslove Općinskog vijeća je izvršavala i slijedeće poslove i radne zadatke: priprema i održavanje 12 sjednica Kolegija Općinskog vijeća, izrada 12 zapisnika i audiozapisa sa sjednica Vijeća, izrada prijedloga okvirnog programa rada Vijeća za 2019. godinu, izrada 406 izvornika usvojenih akata Vijeća, priprema,

obrada i redakcija za 11 izdanja „Službenih novina Općine Kakanj“ sa 164 objavljena akta, ažuriranje Registra propisa Općine Kakanj za 2018. godinu za Registar propisa ZDK i Registar propisa Općine Kakanj 1996. – 2018...

O radu Općinskog vijeća redovno je izvještavana javnost preko web-stranice, a osim toga javnosti su dostupna i vijećnička pitanja i inicijative vijećnika, zapisnici sa sjednica i Službene novine Općine Kakanj. U tehničkom smislu Služba je vijećnicima i javnosti omogućila i elektronski pristup svim dokumentima koji su razmatrani na Vijeću.

U toku 2018. godine podneseno je 11 zahtjeva za pristup informacijama i svi zahtjevi su blagovremeno riješeni. Također, u roku je dostavljen izvještaj Parlamentu Federacije BiH i Instituciji ombudsmena.

Tim za borbu protiv korupcije provodi aktivnosti iz Akcionog plana za borbu protiv korupcije u Općini Kakanj.

U proteklom periodu kontinuirano smo izvještavali o svim aktivnostima općinskog organa uprave (redovno se na adrese tridesetak medijskih kuća i novinara šalju informacije iz Općine), a kroz uspostavljene alate dvosmjerne komunikacije (društvene mreže, web-stranica Općine Kakanj, facebook fan page Općina Kakanj, e-mail: opcinaka@bih.net.ba i urednacelnika@kakanj.com.ba, upućivanje pisma na adresu Općine Kakanj, kutija za komentare i žalbe u prijemnoj kancelariji itd.) građani su dostavljali svoja mišljenja, sugestije, kritike ili primjedbe. Na poslovima informiranja javnosti radili su gotovo svi uposlenici Općine Kakanj. Eko-redari, službenici, referenti, vatrogasci, uposlenici Zavoda, kolege iz javnih preduzeća i ustanova, svi su bili angažirani na dostavljanju informacija (zapisnici, fotosi, izvještaji...) u Stručnu službu za poslove Općinskog načelnika gdje se vrši obrada podataka, te objavljivanje informacija putem raspoloživih alata informiranja. Svaka anonimna prijava nelegalnih aktivnosti u okruženju je zaprimljena i bila je predmet postupanja i intervencije. Svim građanima koji žele ostati anonimni garantiramo anonimnost.

Također ističemo da svaki zaposlenik u administraciji Općine mora biti odgovoran i svjestan da postoji zbog građana, preduzeća i drugih subjekata, te da mu je glavni zadatak profesionalna, stručna, kvalitetna i brza usluga. Svaki korisnik usluga koje pruža Općina Kakanj mora biti dočekan i ispraćen sa osmijehom i vrhunskom ljubaznošću u šalter-sali i svim općinskim službenim prostorijama. Građani su pozvani da prijave slučajeve neprofesionalnog i neljubaznog osoblja na šalterima, kao i drugih službenika Općine Kakanj.

Na kraju 2018. godine održana je press konferencija na kojoj su govorili Općinski načelnik i Predsjedavajući Općinskog vijeća Kakanj, uz prisustvo velikog broj novinara i saradnika Općinskog načelnika.

Broj: 02/1-2090/19
Kakanj, 20.03.2019. godine

OPĆINSKI NAČELNIK

Aldin Šljivo